



Sarajevo, 20.07.2015.

**REPUBLIKA HRVATSKA  
URED PRAVOBRANITELJICE ZA RAVNOPRAVNOST SPOLOVA**

**PREDMET:** Saradnja Agencije za ravnopravnost spolova BiH sa Pravobraniteljicom za ravnopravnost spolova RH

Saradnja Agencije za ravnopravnost spolova Bosne i Hercegovine sa Pravobraniteljicom za ravnopravnost spolova Republike Hrvatske postoji već duži niz godina, ali je posebno intenzivirana od 2013. godine, kada je Ured Pravobraniteljice postao nezaobilazan partner u jačanju regionalne saradnje na pitanjima ravnopravnosti spolova.

Naime, Bosna i Hercegovina je pokrenula regionalnu saradnju u oblasti ravnopravnosti spolova potpisivanjem Regionalne deklaracije o saradnji gender mehanizama Zapadnog Balkana 2005. godine (Sarajevska deklaracija). Od potpisivanja Deklaracije, regionalna saradnja je postala važan segment rada i nastojanja Agencije da se utvrde zajednički prioriteti djelovanja, u skladu sa važećim međunarodnim dokumentima Ujedinjenih nacija, Vijeća Evrope i Evropske Unije.

U novembru 2013. godine Regionalna deklaracija je proširena i na zemlje Mediterana (zemlje Sjeverne Afrike). Pozivajući se na ovu deklaraciju, 2014. godine potpisana je Zajednička izjava o saradnji institucionalnih mehanizama za ravnopravnost spolova zemalja Zapadnog Balkana. Ovu izjavu potpisala je i Pravobraniteljica za ravnopravnost spolova Hrvatske i na taj način se pridružila Deklaraciji s ciljem zajedničkog djelovanja u tri prioritetne oblasti: rod i sigurnost, ekonomsko osnaživanje žena i nasilje nad ženama i u porodici.


Kao direktorica Agencije za ravnopravnost spolova BiH moram naglasiti aktivno učešće i redovan odaziv Pravobraniteljice, gospođe Ljubičić, na sve regionalne aktivnosti koje su uslijedile nakon potpisivanja Izjave, a posebno njeno zalaganje za formaliziranje Regionalnog koordinacionog tijela za ravnopravnost spolova.

Ono što osobito cijenim je spremnost Pravobraniteljice da podijeli svoje iskustvo i znanje, konkretne, praktične i korisne ideje sa ostalim predstavnicima/ama regionalnih mahanizama za ravnopravnost spolova, što je izuzetno važno budući da je Hrvatska, kao članica EU, prošla određeni put koji Bosni i Hercegovini tek predstoji na primjeni principa ravnopravnosti spolova u procesu Evropskih integracija. Ono što je, također, važno napomenuti je i njena spremnost da promovira primjere dobre prakse, kako Bosne i Hercegovine, tako i drugih zemalja u regiji koje su postigle poseban napredak u određenim oblastima.

Pravobraniteljica je pokazala i veliki interes za učešće, ali i pokretanje zajedničkih regionalnih projektnih inicijativa, posebno kada je pitanju provedba Konvencije Vijeća Evrope o prevenciji borbi protiv nasilja nad ženama i u porodici (Istanbulske Konvencije) i UN Rezolucije 1325 "Žene, mir i sigurnost". Zajednička ideja kojom se rukovodimo je doprinos jačanju mira i stabilnosti u još uvijek politički nestabilnoj regiji, ali kroz prizmu rodne ravnopravnosti.

Moje osobno mišljenje je da je Pravobraniteljica izvrstan primjer ženskog liderstva, u kojem pokazuje potrebno znanje i autoritet, ali i otvorenost i spontanost u komunikaciji, koja vjerovatno pomaže da osobe u njenom radnom okruženju pokažu svoj profesionalni maksimum. Takav vid komunikacije primjenjuje i u regionalnoj saradnji i ja, ovim prilikom, mogu samo da uputim izraze kolegijalnog poštovanja i zahvalnosti za dosadašnju saradnju.

S poštovanjem,

DIREKTORICA  
  
Samra Filipović Hadžiabdić